

晉

略

冊八

晉略國傳一

成漢李氏

廩君之裔自黔中從漢定三秦遷巴西宕渠漢末有李虎者依張魯于漢中魏克張魯虎遷略陽臨渭號曰巴氏虎生慕慕生特特字元休及兄輔弟庠流驤皆有材武齊萬年之亂秦民南就食特于路振護之至漢中上書求入蜀弗許詔侍御史李茲持節安監察之茲受賂代請特過劍閣太息曰有如此地面縛於人劉禪真庸才也賈后廢死徵其娼益州刺史趙廐爲大長秋代以成都內史耿滕廐懼圖據蜀以特兄弟爲爪牙滕密表流民剛剽蜀人懦主不制客必爲亂宜使還本廐密知而惡之襲殺滕及西夷校尉陳總自僭大都督大將軍益州牧以庠爲威寇將軍使合六郡壯勇斷北道于縣竹庠習戰不用旗識舉矛成陳廐陰忌之長史杜淑張粲亦說廐除之會庠勸廐僞帝廐因發怒斬庠并其子姪十餘人而撫慰特流以爲督

將特流怒引歸繇竹廠牙門許弇求巴東監軍淑粲執勿許弇怒手殺淑粲左右復殺弇三人者皆廠腹心既自相屠滅廠勢內沮使長史費遠北拒特特燒之走遂攻廠廠走死特上表獻捷于朝廠之初反也詔梁州刺史羅尚遷益州拜徐儉守蜀辛丹守廣漢以佐尚尚又表請牙門將王敦兵萬二千人入蜀廠死尚至尚多欲而無斷特獻珍玩奉牛酒迎勞尚大悅辛丹與特有舊及王敦共勸尚因會取特尚不從丹更謂特曰故人相逢不吉當凶矣特猜懼是歲永寧元年也三月敦討汶山畔羌敗死朝廷符秦雍使還流民又遣御史促之特兄輔至自略陽備言中國亂不足復還乃使閭式賂尚求停至秋尚許之又求至冬丹不許朝廷論誅廠功拜特宣威將軍流奮武將軍皆封侯又使州列上六郡同義者將加賞丹欲自以爲功寢不下又貪流民貲謀因其移徙設關斂之流民既怨尚又感特數請留相率歸特特結大營赤祖以處之移丹求寬丹怒榜購特兄弟首特

見之悉取以歸改其文云能送六郡豪會諸大姓首一首賞百匹流民大懼益附旬月過二萬流別聚亦數千又遣式詣尙式旣知并謀度尙終不可說因辭還尙曰子且以吾意告諸民今聽寬矣式曰甚善然明公惑邪說恐無寬理弱而不可輕者民也衆怒難犯願孰計之尙固言不欺式至告特曰尙雖云若是然刑威不立并等各擁強兵一旦爲變亦非尙所能制也十月特分營爲二自居北營流居東營繕甲礪兵以待并等相與謀曰羅侯無斷日復一日令姦計得展吾屬且爲虜矣決計取之羅侯不足復問也夜使曾元襲特尙聞兵出使田佐助之特安臥不動半入發伏擊之斬諸將傳首示尙并尙曰此虜成去矣辛廣漢不用吾言坐張賊勢且爲柰何于是六郡共推特爲鎮北大將軍益州刺史承制封拜走并廣漢敗尙成都尙緣郫水作長圍以待救太安元年五月援師敗取梓潼巴西特偁大將軍梁益二州都督益州牧八月取德陽明年正月入郫徐儉以少城

降特入據之改年建初惟取馬供軍餘無侵掠蜀民堡塢皆送款特就撫之分六郡民就食焉尙保太城求和弗許流及特子雄言諸降者未可信當取質六郡之衆當聚而自守不宜分散特怒曰大事已定但當安民何爲逆加疑忌乎弗聽朝廷又使荊州刺史宗岱來援建平太守孫阜逼德陽特使子蕩就其守任臧共拒之尙用從事任叡計密說諸邨塢諸邨塢聞救至皆復附尙二月特爲尙所襲殺并輔死焉蕩聞敗引還收餘衆退保赤祖推流爲益州牧保東營蕩保北營孫阜克德陽任臧退屯涪陵阜進逼之岱軍墊江爲後繼三月尙出兵將攻流會流出拒邨民藥紳蕩亦助之尙乘虛攻蕩營符成隗伯畔應尙營中無復將帥蕩母羅親擐甲拒戰刃傷目氣益厲流等破紳還夾擊尙尙退蕩乘勝逐北中矛而死岱阜兵日徧流大懼從李含計遣質請降離爲梓潼守聞之馳還欲諫不及退與雄謀襲阜軍雄大喜謂其衆曰吾屬已與蜀民爲仇一旦束手蜀民魚肉我

立盡矣今臯恃勝而驕襲之可大克也衆皆諾臯軍果破岱亦卒于
墊江荊州兵引去蜀救遂絕流自以智略不及雄悉任以軍事六月
陷汶山取郫七月徙屯郫蜀久被兵民皆流迸或南入湘州或東下
梁荆野無烟火唯涪陵民千餘家在江西依青城山處士范長生尙
參軍徐輿涪陵人也求爲汶山太守欲結長生與官掎角尙不許輿
怒降流流因得長生軍食復振九月流卒衆奉遺命推雄

雄字仲儁特第二子也母羅氏妊十有四月而生雄卒衆推爲大將
軍大都督益州牧尙數來攻雄使朴泰僞降伏驤兵半道而出長梯
郫城外尙使苻成隗伯來襲登梯禽之驤盡俘其衆使呼于成都曰
克郫城矣門啓而入復取少城遂陷犍爲殺太守龔恢絕尙餉道尙
走江陽雄入太城范長生者年百餘歲有名德爲蜀人所信奉雄欲
立以爲君長生不可與諸將固請雄惠帝建武元年十月雄偁成都
王改年建興除晉法約法七章迎長生爲丞相光熙元年三月長生

始至成都雄手版門迎尊之范賢而不名長生勸稱尊號六月僭帝
國號大成年曰晏平追尊特曰始祖景皇帝以長生爲四時八節天
地太師永嘉三年十月太尉離尙書令閻式鎮梓潼爲其下所殺明
年梓潼復爲晉太傅驤司徒雲司空璜攻之雲璜皆死初譙周有子
居巴西成太守馬脫殺之其子登亡奔荊州劉弘表爲梓潼內史使
自募巴蜀流民得二千人至巴郡從羅尙請兵不得自復宕渠斬脫
食其肝會梓潼返正明年正月登遂進據巴西四月雄使張寶僞降
復取梓潼七月羅尙卒皮素代十一月驤攻巴西尙子宇惡登弗予
糧素怒將治宇十二月爲宇所殺建平都尉暴重誅宇巴郡亂驤急
攻登黨鼠而食民無畔者明年二月城陷登死之雄改年玉衡自素
之死也三府吏士推巴東監軍韓松行事州徙巴東暴重殺松衆殺
重推巴守張羅羅戰死推平西司馬王異其後江陽守張啓殺異代
之卒推涪陵守向沈州徙涪陵卒推汶山守蘭維維率吏民北出欲

向巴東爲成將李恭費黑所獲益州亡漢中遘楊虎楊難敵之亂郡人張咸以地來附梁州諸郡唯巴東爲晉寧州平夷平樂三千餘家皆來降雄使鳳鎮涪城任回鎮建寧李恭鎮巴三方克靖太傅驤總內政專務養民刑平年豐民大和樂其賦男丁歲穀三斛女丁半之疾病又半之戶調絹數丈絲數兩新附者復之陳安舉隴右來降仇地僭藩夷王歸附當是時天下大亂成獨無事號爲治安興學校立史官規模掬具矣政務寬簡等威不立官無祿秩軍無號令部伍攻城破邑以虜獲爲先此其所短也四月太師范長生卒其子賁爲丞相永昌元年蕩子稚鎮晉壽嫉鳳功鳳以巴西畔驤討斬之驤子壽代鎮涪城太寧元年正月驤回攻晉臺登殺將軍司馬玖越巂守李釗漢嘉守王載皆以郡降四月進攻寧州敗于堂狼乃還釗明習儀式故事雄甚任之楊難敵偪于劉曜棄仇池奔晉壽趙兵退稚遣歸歸而畔稚怒請討之七月稚及兄瑯出白水壽及瑯弟玠出陰平難

敵距陰平而縱玲稚玲稚長驅至下辨難敵扼其後殲焉雄乃立玲弟班爲太子初雄后任無子妾子十五人羣臣請立嗣雄欲立蕩子玲長且才雄屬意焉太傅驤司徒王達諫弗聽及是立班驤垂泣曰亂始此矣咸和元年六月費黑南破越巂斯笮間一年驤卒壽奔喪玠代鎮間一年壽拜大將軍督中外錄尙書取巴東建平明年仇池降明年壽攻寧州費黑爲前鋒出南廣任調出越巂壽圍朱提太守董炳刺史尹奉遣建寧守霍彪救之壽欲逆距彪黑曰城中食少宜縱入消其穀從之城久不下壽欲急攻之黑曰南中險阻當以日月制之牢溷之物何汲汲也壽弗從攻果不利乃悉以軍事任黑明年正月取朱提炳彪皆降三月奉以州降明年春分寧州置交州以霍彪襲深爲刺史壽還封建寧王六月雄生瘍于頭諸子惡其臭皆遠之唯班晝夜侍且爲吮啗雄以班屬壽而殂班字世文仁孝下士委政于壽唯居中行喪禮九月雄子越自江陽來奔喪與其弟期謀作

忍珎知之勸班遣越還鎮且出期可以已亂曰先帝在殯吾弗亂班也更遣珎還涪十月越因班夜哭弑諸殯宮并殺班兄都奉期而立之號謚雄曰太宗武皇帝墓曰安都陵謚班曰戾太子壽立改謚哀皇帝

期字世運雄第四子也母賤任后子之好學有容觀雄令諸子募部曲多者財數百期獨得千餘人既立進壽大都督徙封漢王以越爲相國封建寧王並錄尙書叔父始代越鎮江陽始說壽共攻期壽不敢發始怒反請殺壽期弗許使壽取珎壽告珎且假道焉珎出奔晉期使壽代鎮涪明年正月改年玉恆九月班舅羅演與漢王相上官澹謀殺期而立班子幽不克及珎子礪皆死尙書令景騫尙書姚華田褒中常侍許涪用事成政始衰明年十一月晉攻漢中壽拒却之期驕虐多誅殺所殺輒籍之大臣自危骨肉不相親壽有威名尤懼不免每當入朝輒詐邊警不赴數過處士龔壯謀自安壯恢之子也

常欲報仇因勸誅期以奉晉壽從之密與長史羅恆解思明謀期頗覺之數使許涪伺察壽又鳩殺壽養弟攸咸康四年四月壽襲成都以奕爲前鋒壽子勢時爲翊軍校尉開門內壽兵越騫褒華涪皆死期被廢爲邛都公自殺諡曰幽葬以王禮

壽字武考驤之子也少爲羅尙所獲尙卒亡歸數立功旣廢期羅恆解思明李奕勸稱王送期建康任調蔡興勸僭帝壽筮之曰可數年天子調喜思明曰數年天子孰與百世諸侯壽曰朝聞道夕死可矣遂自立改國號曰漢年曰漢興尊父驤曰獻皇帝立子勢爲太子以舊廟爲大成廟罷弗祀更立漢廟制度大臣多改易卿佐郡守皆用私人成李子弟無復秉兵馬在形勝者省交州入寧州聘龔壯爲太師不受六月或告大臣謀廢立七月使子廣盟大臣于前殿八月淫雨傷稼壯上書請奉晉壽不悅祕其書九月雄后弟任顏謀反死因盡殺雄諸子明年三月晉復寧州四月復巴東建平壽有疾恆思明

復議奉晉弗許李演上書爭之壽怒殺演壽常慕漢武魏明之爲人
恥聞父兄時事上書者不得言先世政教自以爲勝之也舍人杜襲
作詩託爲應璩以諷諫壽報曰省詩知意若今人所作乃賢哲之話
言若古人所作則死鬼之常詞耳明年後趙王虎書來約伐晉九月
以尙書令馬當爲六軍都督徵集士卒七萬餘人大閱舟師于成都
壽登城觀之欣然自得將以應虎壯思明固諫乃止晉之取巴東也
李閔止焉已而亡入後趙與聘使俱還盛稱虎刑殺之威宮室之麗
壽大慕之明年十二月徙旁郡民三丁以上者實成都大修宮室治
玩器人有小過輒殺以立威僕射蔡興李疑皆坐直諫死政大壞建
元元年八月壽殂子勢立號諡壽曰中宗昭文皇帝墓曰安昌陵
勢字子仁建元二年正月改年太和四月熒惑守心太史令韓皓言
宗廟禮廢所致下羣臣議乃更特雄廟號皆曰漢而復祀焉明年八
月廣求爲太弟弗許馬當解思明固請族之貶廣臨邛侯廣自殺以

奕代鎮涪明年正月奕反攻成都門門者射殺之勢益驕改年嘉寧
恆居禁中不恤國事疏舊臣信左右刑罰酷濫中外離心蜀土先無
獠至是始自山中出巴西梓潼犍爲十餘萬落布山谷爲民害不可
禁制加以饑饉蜀大亂十一月晉桓溫伐之明年二月至青衣勢大
發兵使叔父福從兄權督堅自山陽趣合水諸將欲設伏郫江南以
待敵堅不可引兵自郫江北渡鴛鴦碕向犍爲三月至彭模則溫已
自江南走成都矣堅還救潰于十里陌勢悉衆戰笮橋敗走葭萌使
散騎常侍王幼乞降溫受之送建康封爲歸義侯永和三年也升平
元年卒于建康

論曰民有恆產則安土而重遷政令所設施由此其選也加之以師
旅因之以饑饉鴻雁哀鳴于中澤哲人劬勞而作堵豈不以平世之
民動之易安之難哉秦民入蜀而李氏據蜀蜀民入楚而杜弢亂楚
主客強弱倏忽異形羈旅失業偏于侮辱每作弗靖彰彰如是雖然

此輩皆已違背鄉井崎嶇巖壑分飡藜藿之口剖褐脰肝之上出生
入死朝不謀夕顧乃因瑕蹈釁咄咤而起奮其蛇豕之毒妄冀風雲
之會揆諸素蓄豈暇及斯然則鋌而走險信處之者非其道也和季
作牧荆湘獲安尙丹反之梁益滋擾斯亦得失之林可爲殷鑒者已

晉略國傳一

晉略國傳二

漢趙劉氏

漢建武初南單于居西河美稷中平之亂縣南徙離石單于羌渠卽其東北左國城建庭焉羌渠爲國人所殺子於扶羅立死弟呼廚泉立以於扶羅子豹爲左賢王自以漢外孫冒姓劉氏魏武分其衆爲

五部

左部居隰城右部居祁南部居蒲子北部居新興中部居大陵

部帥皆劉氏豹爲左部帥晉太

康中改帥曰都尉劉氏雖分統五部然皆家晉陽汾澗之濱凡匈奴

十九種屠各最貴

一屠各二鮮支三寇頭四烏譚五赤勤六捍蛭七黑狼八赤沙九鬱鞞十萎莎十一禿童十二勃蔑

十三羌渠十四賀賴十五鍾歧十六大姓四呼延最貴

一呼延氏二大樓十七屈雍十八真樹十九方羯

四喬氏

豹屠各種豹妻呼延氏也祈子龍門妊十二月而生左手文曰

崩遂以爲名字元海幼好學師事上黨崔游習毛詩京氏易馬氏尙

書尤好春秋左氏傳及孫吳兵法史漢諸子無不綜覽兼學武事妙

絕于衆姿儀魁偉身長八尺四寸鬚長三尺餘當心三赤豪長三尺

六寸嘗謂同門生朱紀范隆曰吾觀書傳常鄙隨陸無武絳灌無文
二生遇高皇而不能建封侯之業兩公屬太宗而不能開庠序之美
惜哉善相人者屯留崔懿之襄陵公師或一見驚嘆王渾與結友命
子濟拜焉及爲侍子在洛陽渾言諸武帝帝與語大悅曰由余日碑
之倫也濟因進曰淵文武材用殆過二子陛下若任以東南吳不足
平也帝偁善孔恂楊珧諫曰淵誠雄才然非我族類假令平吳終不
復北渡矣帝默然秦涼覆帝選將上黨李熹復舉淵恂又沮之東萊
王彌者家世二千石涉書記便弓馬爲游俠京師與淵友善將東歸
淵餞諸九曲酒酣謂彌曰王李以鄉曲見知每相偁達讒閒因之而
進恐終死洛陽與子永別矣因泣下已復慷慨獻歎縱酒長歎齊王
攸適出游九曲異其聲覘知之歸請除之渾曰淵長者臣請保無他
且大晉方表信殊俗柰何以無萌之疑殺人侍子乎帝曰渾言是也
尋代豹爲左賢王左部帥太康末拜北部都尉推誠好施予明法禁